



Progjet promovût di 'Il Friuli' e 'ARLeF'

LIS AVENTURIS DI VIGJI E LUMI

CJÂR DIARI,

vuê ti scrîf de mê biele cjasute: biadelore o ai cjatade une paroncine che mi tignarà par simpri! O sin a stâ intun apartament ninin e picinin ma cuntun jet boconon là che jo o pues saltâ e zuiâ dut il dì, fintremai che no si vierç la puarte di jentrade e la mê paroncine e torne a cjase di vore. Di chel moment il jet nol è plui tant grant, parcè che o sin in dôs a zuiâ!

Lis mêz zornadis a son facilis e a misure di gjatute: o duar fintremai lis 7:30 tal clip dal jet, po dopo o mangji lis crochetutis cul salmon, o zui dut il dì cuntune balute e o prepari cualchi sorprese pe mê paroncine cussì e viôt che le pensi tant. O soi un

MATARANE
SI DÏS CUANT CHE
QUALCHIDUN AL È
LEGRI DI SPIRT
MA ANÇJE
UN TIC
STRAMPI!



fregul **matarane**, sî! Vie par chest periodi al è tant facil fâ dispiets: in cjase a son dapardut balutis e cjandelis pal Nadâl!

Ah, cumò mi presenti par vie che o ai un non: jo o soi Lumi.

O ai chest non parcè che o soi lusinte come la lûs e clare come la nêf.

Ti fâs viodi ançje une mê fotografie, o soi blancje e cui voi celescj. Biele, no mo?


Ti saludi cjâr diari, ma ti tornarai a scrivi in curt, parcè che o ai tantis robis di contâti.

Une bussade,
Lumi

Tant par ridi

Chiara e Daria a son te lôr cjamare. Chiara e domande a Daria: "Distude la lûs che o vin di durmî!". Daria e distude la lûs ma e impie une cjandele.

Chiara alore i domande: "Ma parcè âstu impiade une cjandele?", e Daria: "Par viodi se la lûs e jere distudade!".



IL CJANTON DE CJANÇON

DICEMBAR UN BIEL MÈS

(Peraluis di Daria Miani;
musiche di Flaviano Miani)

Al è Dicembar un biel mès,
ce che al puarte lu savès:
il Nadâl cun blancjis monts,
tante nêf cun flocs taronts.

Tant contents a son i frutins
che a decorin duçj i pins,
cu lis lûs e cjandelutis,
tancj colòrs cu lis balutis.

Rit. Al è biel Dicembar, l'ultin mès dal an.
Ator dal fogolâr i fruts e i grancj a stan,
a çampe o a drete,
ai 13 si spiete
Sante Luzie Benedete.

Piçule cerce de cjançon "Dicembar un biel mès".

O podês scoltâle dute te pontade di Maman! di cheste setemane su Telefriuli.

LAVORUT

LU SAVEVISO CHE...?

■ La corone dal Avent e à une structure circolâr, cuvierzude cun ramacis di plantis simpriverdis e cun tantis bielis decorazions. Parsore di jê si inserissin cuatri cjandelis: ogni domenie dal Avent si impie une di lôr.

Qualchidun al use metint cinc, par impiâ une ançje la di di Nadâl. Une tradizion e dis che la prime si clame cjandele dal Profete, la seconde di Betlem, la tierce dai Pastôrs e la cuarte e je chê dai Agnui. Daûr di une altre tradizion, invezit, lis cuatri cjandelis a rapresentin la Sperance, la Pâs, la Gjonde e l'Amôr.



CORONE DAL AVENT DI CARTONCIN

CE CHE US COVENTE

- cartoncins vert scûr e vert clâr;
- cartoncins viole o ros;
- cjarte veline zale o narançone;
- lapis;
- cole;
- scotch;
- fuarpis cu la ponte taronde.



CEMÛT FÂ LA CORONE DAL AVENT DI CARTONCIN

- disegná plui voltis cuntun lapis sui cartoncins verts la sacume des vustris mans;
- taiâ dutis lis sacumis e tacâlis tra di lôr par fâ une forme circolâr;
- taiâ i cartoncins viole o ros a forme retangolâr. Atenzion: a àn di vê duçj la stesse lungjece;
- inrodolâ i tocs retangolârs di cartoncin viole o ros e fissâju cul scotch par fâ cuatri cjandelis;
- preparâ cuatri flamis cu la cjarte veline zale o narançone.

Lis cjandelis a rapresentin lis cuatri domenis che a vegnin prime di Nadâl.

Ogni domenie o podês tacâ une flume suntune cjandele.

Maman! Une gnove stagion cun tantis sorpresis! Us din apontament su

telefriuli



Vinars aes 5.45 sot sere

Pagjinis curadis di Daria Miani
Consulente linguistiche de ARLeF

ARLeF
AGENZIE
REGIONÂL
PE LENGHE
FURLANE